

詩

集

傳

詩集傳卷第十九

清廟之什

周頌

周頌皆有所施於禮樂蓋因禮而作頌非如風雅之詩有徒作而不用者也文武之世天下未平禮樂未備則頌有所夫暇至周公成王天下既平制禮作樂而爲詩以歌之於是頌聲始作然其篇第之先後則不可究矣考之以其時則不倫求之以其事則不類意者亦以其聲相從乎清廟之什禮之大者也臣工之什禮之次者也閔予小子之什禮之小者也然時有參差不

齊者意者亦以其聲相從也然不可得而推矣  
清廟祀文王也

於穆清廟肅雝顯相濟濟多士秉文之德對越在  
天駿奔走在廟不顯不承無射於人斯

於乎美哉其祀文王於清廟也有肅肅其敬雝  
雝其和者實來顯相其禮文王沒矣其神在天  
其主在廟然士之來助者猶不忘秉持其德以  
對其在天而奔走其在廟者言文王之澤久而  
不忘豈其不顯不承哉信矣其無厭於人也肅  
然清淨曰清廟對配也越辭也駿長也

清廟一章八句

維天之命太平告文王也

維天之命於穆不已於乎不顯文王之德之純假以溢我我其收之駿惠我文王曾孫篤之

文王受命未終而沒周公成王繼之天下大平以爲文王之德之致也故以告之曰天命之於周久而不已文王亦既沒矣而其德美不土以大盈溢我後人我後人收之以成大平天命之不已也如此今將以長順文王之心惟爾子孫世益厚之

維天之命一章八句

維清奏象舞也

象文王之樂所謂象箛者蓋文舞也文王之舞謂之象武王之舞謂之武將舞象則先歌維清故其序曰奏象舞而其辭稱文王將舞武則先歌武故其序曰奏大武而其辭稱武王記曰十三舞勺勺大武也十五舞象象象箛也武而謂之勺者酌之序曰告成大武蓋因此詩而名之也

維清緝熙文王之典肇禋迄用有成維周之禎

緝和也熙光也周公之治周也事爲之制曲爲  
之防是以其國無不脩之政政無不脩清也清  
則其爲之也暇而事之也至是以無不和洽而  
光明者君子推其所由致之曰由文王之法文  
王之造周也實始肇祭天地先爲之極焉迄于  
周公遂以有成其成雖當周公之世然其禎祥  
見於文王矣

維清一章五句

烈文成王即政諸侯助祭也

古之儒者皆言武王崩成王幼不能踐阼周公

攝天子位以爲政七年而後反余考於詩書無之古者君薨世子即位諒闇而聽於冢宰三年蓋免喪而復成王之終喪也以幼不能聽政而聽於周公七年而復故書稱武王崩三監及淮夷畔周公相成王以黜商有大政令未嘗不稱王命也然則成王旣已即位矣成王旣已即位而周公攝則昆二王者也蓋武王崩成王無所復父不得稱子則逾年即位而稱王雖稱王矣而不能治王事故未嘗即政是以周公當國而治事非攝其位蓋行其事也其後七年退而復

辟則成王於是即政亦非復其位蓋復其事也  
故此詩之序曰成王即政即政非即位也苟成  
王有即位有即政則周公之未嘗攝位明矣或  
曰即政亦即位也然則未終喪而爲詩以作樂  
可乎

烈文辟公錫茲祉福惠我無疆子孫保之無封靡  
于爾邦維王其崇之念茲戎功繼序其皇之無競  
維人四方其訓之不顯維德百辟其刑之於乎前  
王不志

成王朝享於廟諸侯來助者以祖考之命錫之



社福其曰烈文辟公呼而告之也諸侯能奉順  
王室則子孫安矣無封以專利無靡以專欲則  
王尊之矣念其先祖之功則繼其序者益大矣  
勤於擇人則四方順之矣敏於爲德則百辟憲  
之矣凡此五者先王之所以不忘諸侯而教之  
也烈光也辟公皆君也

烈文一章十三句

天作祀先王先公也

祀時祀也周之初時祀猶及先公

天作高山大王荒之彼作矣文王康之彼祖矣岐

有夷之行子孫保之

高山岐山也大王遷於岐山始荒而有之亦既作之矣文王從而安之文王既逝矣岐周之人世載其夷易之道子孫保之不替也

天作一章七句

昊天有成命郊祀天地也

郊謂冬至祭昊天於圜丘夏至祭地祇於方澤詩稱昊天是以知非祈穀之郊也

昊天有成命二后受之成王不敢康夙夜基命宥密於緝熙單厥心肆其靖之

天將祚周以天下既有成命矣文武受之將成  
其王業不敢安也夙夜積德以爲受命之基蓋  
未嘗求之亦未嘗舍之也未嘗求之所謂宥也  
未嘗舍之所謂密也宥之也者聽其自至也密  
之也者欲及其特也文武之所以答天命者如  
此於乎及其和洽而光明也盡其心矣故能定  
之也此詩有成王不敢康而執競有不顯成康  
世或以爲此言成王誦康王釗也然則周頌有  
康王子孫之詩矣周公制禮禮之所及樂必從  
之樂之所及詩必從之故頌之施於禮樂者備

矣後世無容易之且詩曰成王不敢康夙夜基  
命宥密又曰自彼成康奄有四方成王非基命  
之君而周之奄有四方非自成康始也

昊天有成命一章七句

我將祀文王於明堂也

此傳所謂祀文王於明堂以配上帝者也記曰  
有虞氏禘黃帝而郊嚳祖顓頊而宗堯夏后氏  
亦禘黃帝而郊鯀祖顓頊而宗禹商人禘嚳而  
郊冥祖契而宗湯周人禘嚳而郊稷祖文王而  
宗武王鄭氏以祖宗為明堂之配而王氏以祖

宗爲不毀之廟予竊以鄭氏爲不然何者四代之所禘皆其祖之所自出廟之所不及者也其所祖者廟之所自始者也其所郊者先世之有功者也其所宗者近世之有功者也有虞氏繼堯堯學非其姓也故禘黃帝而郊學祖顓頊而宗堯黃帝顓頊之所自出而顓頊舜之祖此其不可易者也堯學則舜之所繼而有功者也故舜之將攝也受終于文祖堯之祖也禹之將攝也受命于神宗舜之宗也將以天下予人必告其所從受天下舜之所從受天下者堯也則舜

之以堯爲宗也明矣夏商之所禘祖猶舜也而其所郊宗則其世之有功者也至周亦然其所以爲異者后稷祖也文武皆王業之所自成也故雖以后稷爲太祖而其禘於廟也先公之主禘於稷廟先王之主禘於文武之廟雖其所以禘太祖也雖爲文王之詩故文王亦祖矣文王爲祖故后稷升於郊此其所以異於夏商而已故祖宗之號非所以施於明堂也

我將我享維羊維牛維天其右之儀式刑文王之典日靖四方伊嘏文王既右饗之我其夙夜畏天

三十九  
之威于時保之

將奉也其獻也其饗上帝於明堂也奉其牛羊而獻之曰天其尚右我而饗此乎蓋不敢必也故自託於文王庶幾可以致之曰我今儀式刑文王之典以靖天下苟天不遺文王而嘏之其亦既右饗我哉天之難致也如是是以夙夜畏天之威而保文王之法庶幾可得而致也

我將一章十句

時邁巡守告祭柴望也

時邁其邦昊天其子之實右序有周薄言震之莫

不震疊懷柔百神及河喬嶽允王維后明昭有周  
式序在位載戢干戈載櫜弓矢我求懿德肆于時  
夏允王保之

王者以時巡行邦國曰天其尚子我哉則曰天  
實右序我有周矣不然四方之諸侯豈其薄震  
動之而無不震懼以歸周者我是以能巡守於  
方嶽柴告天地望秩山川徧于羣神信矣我周  
王維君矣然我有周豈以是求多於諸侯哉蓋  
亦次叙其朝之羣臣斂其甲兵而收藏之求有  
德之人而布之於諸夏以藩屏周室如是而已



然後信能保有天下此所謂明也

時邁一章十五句

執競祀武王也

執競武王無競維烈不顯成康上帝是皇自彼成  
康奄有四方斤斤其明鍾鼓喤喤聲筦將將降福  
穰穰降福簡簡威儀反反既醉既飽福祿來反

競彊也武王持其彊心爲而不捨故天下莫能  
與之競遂成其王業而安之爲天之所君夫周  
之興也遠矣至於武王成而安之然後能奄有  
四方使其明無所不至凡今所以能備其禮樂

脩其祭祀以受多福者皆武王之德之致也。嘒，和也。將，將集也。穰穰，衆也。簡簡，大也。反，反順習也。復也。

執競一章十四句

思文后稷配天也

周頌有祭天之詩三焉。其一曰昊天有成命，以郊祀天地。此所謂禘，饗祀昊天於園丘，而以饗配之者也。其二曰我將祀文王於明堂，此所謂宗祀文王於明堂，以配上帝者也。其三曰思文后稷配天，此所謂郊稷，禘其祖之所自出，而以

其祖配之者也此三者其說皆出於鄭氏古之論郊祀者莫密於鄭氏然世或以其怪而不信予以爲鄭氏近之而不善言之故爲之辨曰天一而已然而天有五行五行之神而尊之曰五帝不可謂無六天也古之帝王以五行之德迭王天下故以火德者曰炎帝以土德者曰黃帝古之帝王以五德相授而有天下其來尚矣至於周而爲木故以其行王天下則又特祀其神此亦理之當然也然鄭氏之說則怪矣曰昊天者耀魄寶蒼帝者靈威仰赤帝者赤標怒黃帝

者舍樞紐白帝者白招矩黑帝者叶光紀帝王  
之以其德王天下者皆其所感而生也此尚何  
以使學者信之然鄭氏之所謂感生者禮之所  
謂祖之所自出也然則記者亦過矣史稱秦襄  
公居西方自以爲主少皞之神故作西時以祀  
白帝其後宣公作密時以祀青帝靈公作吳陽  
上時以祀黃帝下時以祀炎帝漢高帝曰吾聞  
天有五帝而不足一何也於是復作北時以祀  
黑帝其說皆與鄭氏合故鄭氏之說古矣而所  
以言之非也若夫王氏之學有昊天而無五行

故曰禮之所謂禘饗者大祭於廟而以饗為祖也所謂郊稷者祀昊天而以稷配也所謂祀文王於明堂者亦以配昊天也予竊非之何者周人推其受命之祖曰文王始封之祖曰后稷故周人之廟至稷而止又推而上之曰后稷生於姜原則又立姜原之廟曰先妣姜原帝饗之妃而特立廟則饗無廟矣無廟則無主無主則無以禘無廟則無所禘將禘於后稷之廟是以父而下禘於子之廟非禮也且夫肅之所謂其祖之自出者饗也以饗為祖之所自出可也未有

禘祖之父而以祖配之者也王者之祭天地維  
外之故爲之配以主之禘祖之父而爲之配是  
外祖之父也由是言之粢不得與宗廟之禘而  
祖之所自出者非粢則所謂禘粢者誠配天也  
思文后稷克配彼天立我烝民莫匪爾極貽我來  
牟帝命率育無此疆爾界陳常于時夏

堯遭洛水之患黎民阻飢后稷播百穀以食之  
然使民復粒食也方是時也天降嘉種以遺之  
使徧養於四方無曰此吾疆也彼爾界也布之  
於諸夏使常種之而後已立粒通極中也能粒



臣工諸侯助祭遣於廟也

嗟嗟臣工敬爾在公王釐爾成來咨來茹嗟嗟保  
介維莫之春亦又何求如何新畬於皇來牟將受  
厥明明昭上帝迄用豐年命我衆之序乃錢鑄奄  
觀銍艾

釐賜也茹度也保介車右也月令孟春天子親  
載耒耜鑿之千參保介之御間田一歲曰新三  
歲曰畬庠具也錢銚也鑄鑄也銍穫也諸侯朝  
正於王因助祭於廟祭終而遣之遂戒其羣臣  
百工曰戒尔公事王既賜爾成法有所不知則



來咨度以定之既又戒其車右曰今既莫春矣  
其亦視爾田事問其如何而勸督之昔后稷播  
殖百穀天寶降之嘉種大受其明以至于今常  
有豐歲尔其亦使衆人具其田器以勸田事其  
亦大有刈矣

臣工一章十五句

噫嘻春夏祈穀于上帝也

所謂啓蟄而郊龍見而雩是也

噫嘻成王既昭假爾率時農夫播厥百穀駿發爾  
私終三十里亦服爾耕十千維耦

噫嘻歎也天之所以成我王業者既昭至矣我  
今率是典田之農夫令民無不咸播百穀曰其  
大發爾私盡三十里而後已既令之民之服其  
耕者萬人皆出於野言人事盡矣所不足雨耳  
是以告之天也私民田也上之告民則先其私  
民之奉上則先其公曰雨我公田遂及我私交  
相愛也周官凡治野夫間有遂遂上有徑十夫  
有溝溝上有畛百夫有洫洫上有塗千夫有澮  
澮上有道萬夫有川川上有路萬夫之地方三  
十二里有半言三十里舉成數也耜廣五寸二



終此譽愛之至也

振鷺一章八句

豐年秋冬報也

報謂秋祭四方冬祭八蜡

豐年多黍多稌亦自高廩萬億及秭爲酒爲醴烝  
畀祖妣以洽百禮降福孔皆

徐稻也數萬至萬曰億數億至億曰秭烝進也  
畀予也皆徧也豐年載芣皆非宗廟之詩而曰  
烝畀祖妣何也以爲所以能進享先祖者皆方  
蜡社稷之功也

豐年一章七句

有瞽始作樂而合乎祖也

始作樂謂周公始成大武也祖謂大祖文王也  
有瞽有瞽在周之庭設業設虛崇牙樹羽應田縣  
鼓鞀磬祝圉既備乃矣簫管備舉喤喤厥聲肅雝  
和鳴先祖是聽我客戾止永觀厥成

瞽樂官也樹月崇牙上飾也應小鞀也田當作  
棟應鞀之屬也皆在縣鼓之上縣鼓大鼓也周  
人始縣鞀鞀鼓也祝控也圉楬也簫編小竹管  
爲之管如篴併而吹之

有瞽一章十三句

潛季冬薦魚春獻鮪也

季冬魚絜而美春鮪新來故獻於宗廟

猗與漆沮潛有多魚有鱣有鮪鱠鯨鯉以享以祀以介景福

漆沮岐周之二水也潛溙也鱣大鯉也鮪鮠也  
鱣白鱣也鯨鮪也

潛一章六句

雝禘太祖也

禘宗廟之大祭所謂禘祫者也太祖文王也或

言周人以諱事神而此詩有克昌厥後則太祖  
非文王也然周之所謂諱者不以其名號之耳  
不遂廢其文也諱其名而廢其文者後世之禮  
而非周之故疑之過矣

有來雝雝至止肅肅相維辟公天子穆穆於薦廣  
牡相予肆祀

其來也和其至也敬其助者公侯其薦者天子  
也故於其薦大牡也皆助陳其饌言得天下之  
歡心也

假哉皇考綏予孝子宣哲維人文武維后燕及皇

天克昌厥後綏我眉壽介以繁祉既右烈考亦右  
文母

大哉我皇考文王之安我也其臣明哲其君文武故能安人以及於天天地神人莫不蒙享其利故能昌其後嗣安之以眉壽助之以多福然此非獨文王之致也文母大妣之德亦有以右我矣大禘之禮先王之臣有與祭者故於是稱宣哲維人焉

雝一章十六句

載見諸侯始見乎武王廟也



烈文言成王即政諸侯助祭而載見言諸侯始見乎武王廟則載見之作也成王未即政歟

載見辟王曰求厥章龍旂陽陽和鈴央央絛革有鷩休有烈光率見昭考以孝以享以介眉壽永言保之思皇多祐烈文辟公綏以多福俾緝熙于純嘏

載始也軾前曰和旂上曰鈴鷩金飾貌也諸侯始來見王求法度以好其車服從之以祭武王之廟思介之以眉壽而大其多祐而王之所以待辟公者則亦以多福綏之使和合於神之所

嘏言君臣相與之厚也

載見一章十四句

有客微子來見祖廟也

有客有客亦白其馬有萋有且敦琢其旅有客宿  
宿有客信信言授之絜以絜其馬薄言追之左右  
綏之既有滏威降福孔夷

絜尚白亦仍也言仍絜之舊也萋萋且且敬慎  
貌也敦琢選擇之也旅其御大夫也一宿曰宿  
再宿曰信絜其馬音愛之不欲其去也追送也  
左右綏之言所以安之無方也滏大也夷易也

能威人則能福人矣愛之至故欲其能威福人也

有客一章十二句

武奏大武也

於皇武王無競維烈允文文王克開厥後嗣武受之勝勢遏劉耆定爾功

於乎大矣武王無競之功文王開之也文王既開其迹武王嗣而受之勝勢而止其殺人其成功也老矣武迹也遏止也劉殺也耆老也

武一章七句

閔予小子之什

周頌

閔予小子嗣王朝於廟也

閔予小子遭家不造嬛嬛在疚於乎皇考永世克  
孝念茲皇祖陟降庭止維予小子夙夜敬止於乎  
皇王繼序思不忘

成王始見於宗廟自傷嬛嬛無所依怙曰於乎  
我皇考武王終身能孝維念我皇祖文王以其  
直心陟降天人之際無有不達今我夙夜敬止  
則亦不忘此而已蓋周之先君能陟降在帝左  
右者惟文王也庭直也

閔子小子一章十一句

訪落嗣王謀於廟也

訪子落止率時昭考於乎悠哉朕未有艾將予就之繼猶判渙維子小子未堪家多難紹庭上下陟降厥家休矣皇考以保明其身

閔子小子成王朝廟言將繼其祖考之詩也訪落謀所以繼之之詩也訪謀也落始也曰予將謀之於始以循我昭考武王之德然而其道遠矣予不能及也將使予勉強以就之猶恐判渙不合也今將紹文王以其直心交際上下常若

陟降近在其家者美哉此皇考之所以保明其身者將何以致此哉

訪落一章十二句

敬之羣臣進戒嗣王也

敬之敬之天維顯思命不易哉無曰高高在上陟降厥士日監在茲維予小子不聰敬止日就月將學有緝熙于光明佛時仔育示我顯德行

敬之羣臣所以荅訪落也故戒之曰天命之於人顯矣不可易也無謂其高而不吾察非獨人君陟降在帝左右天亦常陟降以察其士而況

於王乎王之不可不敬者如此王曰我未能明  
所謂敬者庶幾日有所就月有所成講之以學  
使心之光明者和洽而見於外又屬任輔拂使  
導我以德行可以答天顯者然後敬可得也佛  
輔也仔有任也

敬之一章十二句

小毖嗣王求助也

毖慎也慎之於小則大患無由至矣

子其懲而毖後患莫予荇蜂自求辛螫肇允彼挑  
蟲拚飛維鳥未堪家多難予又集于蓼

莽使也。桃蟲，鷦鷯也。古語曰：鷦鷯生鵬，始小而終大。蓼取其辛苦也。成王始信二叔，以疑周公。既而悟其姦，故曰：予其懲，是以茲後患羣。臣勿使子者矣。子猶蜂耳，苟使子，子將螫女。昔也始信以爲是桃蟲耳，無能爲也。及其翻然而飛，則大鳥也。子方未堪多難，而又集于辛苦之地，其奈何？舍我而弗助哉。

小毖一章八句

載芟春藉田而祈社稷也。

禮王爲民立社曰大社，自爲立社曰王社。王社



在藉田中藉田所祈也

載芟載柞其耕澤澤千耦其耘徂隰徂畛侯王侯伯侯亞侯旅侯疆侯以有噴有盭思媚其婦有依其士有略其耜俶載南畝播厥百穀實函斯活騾驛其達有厭其傑厭厭其苗緜緜其庶載穫濟濟有實其積萬億及秭爲酒爲醴烝畀祖妣以洽百禮有飶其香邦家之光有椒其馨胡考之寧匪且有且匪今斯今振古如茲

載始也除草曰芟除木曰柞澤澤解散也耘除根株也隰新發之田也畛舊田有術路者也主

家之長也伯其長子也亞仲叔也旅衆子弟也  
彊民之有餘力而來助者所謂彊予也能左右  
之曰以所謂間民轉徙執事者也噍嗜食聲也  
依愛也略利也函含也活生也既播之其實含  
氣而生也驛驛苗生貌也達出土也厭然茂甚  
也傑先長者也繇繇詳密也庶耘也濟濟人衆  
貌也餼椒皆香也以燕饗賓客則邦家之光也  
以養耆老則胡考之所以安也且此也振自也

載芟一章三十一句

良耜秋報社稷也

畷畷良耜俶載南畝播厥百穀實函斯活或來瞻  
汝載筐及筥其饒伊黍其笠伊糾其鍤斯趙以疇  
荼蓼荼蓼朽止黍稷茂止穫之桎桎積之粟粟其  
崇如墉其比如櫛以開百室百室盈止婦子寧止  
殺時特牲有捄其角以嗣以續續古之人

畷畷嚴利也或來瞻女婦子之來饁者也筐筥  
饒具也糾然笠之輕舉也趙刺也荼陸草也蓼  
水草也桎桎穫聲也粟粟精也百室一族之人  
也族人輩作相助故同時入穀特牲社稷之牲  
也以嗣以續興來歲繼往歲也續古之人庶幾

不替其先也

良耜一章二十三句

絲衣繹賓尸也

祭之明日復祭曰繹所以賓尸也天子諸侯曰繹以祭之明日鄉大夫曰賓尸與祭同日周曰繹商曰彤毛氏之序稱高子之言曰靈星之尸也絲衣本宗廟之詩其稱靈星既已失之然又有以知毛氏雜取衆說以解經非皆子夏之言凡類此耳

絲衣其紆載弁俵俵自堂徂基自羊徂牛鼐鼎及

嘉鼎兕觥其觥旨酒思柔不吳不敖胡考之休

絲衣爵弁士助祭服也紆鮮絜貌也侏侏恭也  
堂門堂也基門塾之基也鼎大鼎也嘉鼎小鼎也  
吳譁也禮繹於廟門之外其禮薄於正祭故使  
士升門堂視壺濯及邊豆降適於基告濯具遂  
視牲自羊而之牛反告充已乃舉鼎幕告絜然  
後祭祭終旅酬而置爵爵無有譁譁敖慢者於  
是神畀之以胡考之福

絲衣一章九句

酌告成大武也

於鑠王師遵養時晦時純熙矣是用大介我龍受  
之躑躑王之造載用有嗣實維爾公允師

鑠盛也遵循也熙光也介助也躑躑武貌也載  
始也公事也文王有於鑠之師而不用退自循  
養與時皆晦晦而益明其後既純光矣則天下  
無不助之者文王於是遂寵受之躑然起而王  
之夫文王既造其始矣故其後有嗣之者武王  
之興也實維文王之事信爲之師夫方其不可  
而晦見其可而王之此所以爲酌也而毛詩之  
序曰能酌先祖之道以養天下則是詩之所不

言也

酌一章八句

舊說酌九句其實八句耳

相講武類禡也

王者將出征則講武而類上帝禡于所征之地  
綏萬邦婁豐年天命匪解相相武王保有厥土于  
以四方克定厥家於昭于天皇以間之

武王克商以安天下婁獲豐年之祥矣然天  
命之於周久而不厭也故武王相相保有其衆  
用之四方之不服以定其家其德上昭于天遂

以代商有天下言武之不可廢也皇君也間代也

相一章九句

賚大封於廟也

賚子也

文王既勤止我應受之敷時繹思我祖維求定時周之命於繹思

敷布也時是也繹陳也思辭也文王之勤勞天下至矣其子孫應受而有之然而不敢專也是以布陳之以與人維以行求天下之定而已非



求利也此周之所以命諸侯者於乎其陳之嘆  
之也

賚一章六句

般巡守而祀四嶽河海也

般般遊也

於皇時周陟其高山墮山喬嶽允猶翕河敷天  
之下哀時之對時周之命

墮狹長也喬高也猶道也翕河大河受衆水者  
也哀總也對荅也於乎美哉王之巡行天下也  
陟其山嶽而道於大河思其有功於民是以至

於敷天下無不總蒼其功者此周之命也

般一章七句

詩集傳卷第十九

詩集傳卷第二十

駟

魯頌

魯少昊之墟而禹貢徐州大野蒙羽之野成王以封周公之子伯禽十九世至僖公魯人尊之其沒也其大夫季孫行父請於周而史克爲之頌然魯以諸侯而作頌世或非之余以爲不然詩有天子之風有諸侯之風有天子之頌有諸侯之頌二者無在而不可凡爲是詩者則爲是名矣古之王者治其室家而後及於其國故以家爲本以國爲末家者風之所自出而國者雅

之所自成也其爲本也必約而精其爲末也必大而粗約而精者其微也大而粗者其著也微則易失著則難喪是以文武之詩始於二南而繼之以二雅先其本也方其盛也其風加於天下橫被而獨見則有二南而無諸侯之風其後王德既衰衰始於室家二南之風先絕而不繼國異政家殊俗則周人之風不能及遠而獨爲黍離諸侯之風分裂而爲十一故風之爲詩無所不在也當是時也王者之風雖亡然其所以爲國猶在也故雖幽厲之世而雅不絕至於平

王東遷而喪其所以爲國則雅於是遂廢故詩  
惟雅爲非天子不作也頌之爲詩本於其德而  
已故天子有德於天下則天下頌之諸侯有德  
於其國則國人頌之商周之頌天下之頌也魯  
人之頌其國之頌也故頌之爲詩無所不在也  
是二者無所不在故其用之於樂也亦然記曰  
天子之射也以騶虞爲節諸侯以狸首爲節大  
夫以采蘋爲節士以采芣爲節諸侯相見歌文  
王大明絳大饗升歌清廟下而管象客出以雍  
撤以振羽饗鄰國之使歌鹿鳴四牡皇皇者華

天子諸侯未有不以風雅頌爲樂之節者也然古之說詩者則不然曰一國之事繫一人之本謂之風言天下之事形四方之風謂之雅美盛德之形容而告於神明謂之頌然則風之作本於諸侯而雅頌之作本於天子及其考之於詩而不然於是從而爲之說曰二南之爲風文王之未王也黍離之爲風大師之自黜也魯之爲頌諸侯之僭也及其考之於樂而不然於是又從而爲之說曰天子之樂之歌風下就也諸侯之樂之歌雅上取也旣爲一說而不合又爲一

說以救之要將以尊天子而黜諸侯是以學者  
疑之今將折之莫若反而求其所以爲風爲頌  
之實曰風言其俗風之實也頌頌其德頌之實  
也豈有天子而無俗諸侯而無德者哉蓋古之  
王者慎其德而無失其政使天下之諸侯不善  
者廢善者不能獨見其化一出於天子未嘗禁  
其爲詩而其詩亦無由而作也及至王德已衰  
諸侯國自爲政善惡雜然交見於下雖欲禁其  
爲詩其勢亦不可得止矣故未嘗爲之制徒一  
其政於天下則天子之詩獨見於世諸侯之詩

熄矣

駟頌僖公也

駟駟壯馬在坳之野溥言駟者有駟有皇有驪有黃以車彭彭思無疆思馬斯臧

駟駟腹幹肥張也邑外謂之郊郊外謂之牧牧外謂之野野外謂之林林外謂之坳農利於近而遠不害馬故養馬於坳不以馬害農也驪馬白跨曰駟黃白曰皇純黑曰驪黃駢曰黃彭彭有力有容也諸侯六閑馬四種有良馬有戎馬有田馬有駑馬故此詩四章以次言之僖公推



其誠心以治其國家其思慮無所不及以爲不可徧舉故舉其一曰思馬斯臧苟思馬而馬善則凡其思慮之所及未有不善者也非至誠而能若是乎

駟駟牡馬在坰之野薄言駟者有騅有駢有騂以車伍伍思無期思馬斯才

倉白雜毛曰騅黃白雜毛曰駢赤黃曰駢倉棋曰騂伍伍有力也才材力也

駟駟牡馬在坰之野薄言駟者有騅有駢有騂有騂以車繹繹思無斃思馬斯作

青驪驎曰驛白馬黑驎曰駱赤身黑驎曰駟黑  
身白驎曰雉繹繹善走也駁厭也作奮起也

駟駟牡馬在坳之野薄言駟者有駟有駮有驥有  
魚以車祛祛思無邪思馬斯祖

陰白雜毛曰駟彤白雜毛曰駮豪駮曰驛二目  
白曰魚祛祛強健也祖行也孔子曰詩三百一  
言以蔽之曰思無邪何謂也人生而有心心緣  
物則思故事成於思而心喪於思無思其正也  
有思其邪也有心未有不思者也思而不留於  
物則思而不失其正正存而邪不起故易曰閑

邪存其誠此思無邪之謂也然昔之爲此詩者則未必知此也孔子讀詩至此而有會於其心是以取之蓋斷章六爾

駟四章章八句

有駟頌僖公也

有駟有駟駟彼乘黃夙夜在公在公明明振振鷺鷺于下鼓咽咽醉言舞于胥樂兮

駟馬肥強貌也人之於馬也將用其力則致其養以肥強之馬之肥強非有所自用亦以爲人用而已僖公盡其養以養臣臣盡其力以報君

亦猶是也故曰夙夜在公在公明明言未始不在公也僖公於是燕之以禮樂士之來者如鷺之集其醉者或起舞以相樂和之至也

有駉有駉彼乘牡夙夜在公在公飲酒振振鷺鷺于飛鼓咽咽醉言歸于胥樂兮有駉有駉彼乘駟夙夜在公在公載燕自今以始歲其有君子有穀貽孫子于胥樂兮

青驪曰駟有歲豐年也穀祿也臣安其君故願其富且有後也

有駉三章章九句

泮水頌僖公也

此詩言既作泮宮遣將出兵以克淮夷閔宮言公子奚斯作新廟今考於春秋其事皆不載世有以是疑二詩之妄者予嘗辨之泮宮魯之學也閔宮魯之廟也自魯先君而有之矣僖公因其舊而脩之是以不見於春秋至於淮夷之功予亦疑焉然此詩有之式固爾猶淮夷卒獲有所未獲而欲終之則其所獲尚少也自僖公至於孔子八世事之小者容有失之其大者未有不錄也今此詩之言甚美而大則君臣之辭歟

或曰以君臣而爲此辭可也而孔子錄之可乎  
曰維可之是以錄之錄其所可而去其所不可  
此孔子之所以爲詩也子貢曰紂之不善不如  
是之甚也是以君子惡居下流天下之惡皆歸  
焉孟子曰吾於武成取二三策而已以至仁伐  
不仁何其流血之漂杵夫二子之言信矣然孔  
子未嘗以廢周書蓋好惡之言必有過者要不  
以惡爲善則已矣此達者之所自諭也

思樂泮水薄采其芹魯侯戾止言觀其旂其旂  
旒戔戔聲噦噦無小無大從公于邁

天子之學曰辟雍諸侯曰泮宮辟雍水園如璧  
泮宮半之也僖公作泮宮而其民樂之曰吾思  
樂泮水之上雖無所得聊采其芹而足矣況於  
往而見魯侯哉茂茂飛揚也噦噦和也

思樂泮水薄采其藻魯侯戾止其馬蹻蹻其馬蹻  
蹻其音昭昭載色載笑匪怒伊教

僖公之至於泮宮也則好其顏色和其笑語未  
嘗有所怒也教之而已

思樂泮水薄采其茆魯侯戾止在泮飲酒既飲旨  
酒永錫難老順彼長道屈此羣醜

茆鳧葵也僖公與其羣臣飲酒於泮宮咸願神  
錫之以難老使之順從長道以屈羣衆夫苟無  
其人雖有其道不能從也苟無其道雖有其衆  
不能服也是以願僖公之難老也

穆穆魯侯敬明其德敬慎威儀維民之則允文允  
武昭假烈祖靡有不孝自求伊祜

烈祖伯禽也僖公信文且武其明至於伯禽故  
魯人化之無有不孝者

明明魯侯克明其德既作泮宮淮夷攸服矯矯虎  
臣在泮獻馘淑問如臯陶在泮獻囚



古之出兵受成於學及其反也釋奠於學而以  
訊馘告

濟濟多士克廣德心栢栢于征狄彼東南烝烝皇  
皇不吳不揚不告于訥在泮獻功

古狄逖通訥訟也言其羣臣無忿狃之心故於  
其征淮夷而逖遠之於東南也雖烝烝其衆皇  
皇其大未嘗有謹譁輕揚相告於訟者是以能  
成功而還獻之於泮宮

角弓其觶東矢其搜戎車孔博徒御無數既克淮  
夷孔淑不逆式固爾猶淮夷卒獲

觚弓健貌也搜矢疾聲也東矢百矢也倍公兵  
戎精繕士卒競勸故能克淮夷甚善而不逆君  
子於是告之使益固其道庶幾淮夷可以盡得  
也

翩彼飛鴉集于泮林食我桑黓懷我好音憬彼淮  
夷來獻其琛元龜象齒大賂南金

鴉惡聲鳥也食泮林之黓而猶以好音歸之況  
於人安有不化服者哉憬覺悟也琛寶也賂遺  
也南金荆揚之金也荆揚之貨其至於齊魯也  
自淮而上

泮水八章章八句

閔宮頌僖公也

毛詩之序曰駟頌僖公也有駟頌僖公君臣之有道也泮水頌僖公能修泮宮也閔宮頌僖公能復周公之宇也夫此詩所謂居常與許復周公之宇者人之所以頌之而其實則未能也而遂以爲頌其能復周公之宇是以和三詩之序皆後世之所增而駟之序則孔氏之舊也

閔宮有恤實贊枚枚赫赫姜嫄其德不回上帝是依無災無害彌月不遲是生后稷降之百福

魯以周公故得立姜嫄之廟僖公修而新之閔神也血清淨也實實鞏固也枝枝龍宮密也

黍稷重穋植稗菽麥奄有下國俾民稼穡有稷有黍有稻有秬奄有上下續禹之緒

先種先熟曰植後種後熟曰穋洪水既平后稷乃始播種百穀故曰續禹之緒

后稷之孫實維太王居岐之陽實始剪商至于文武續大王之緒致天之屆于收之野無貳無虞上帝臨女敦商之旅克咸厥功

屆極也敦并之也咸兼也能兼舉先祖之功也

王曰叔父建爾元子俾侯于魯大啓爾宇爲周室  
輔乃命魯公俾侯于東錫之山川土田附庸

王成王也叔父周公也元子魯公伯禽也附庸  
不能自達於天子而附於大國也

周公之孫莊公之子龍旂承祀六轡耳耳春秋匪  
解享祀不忒皇皇后帝皇祖后稷享以騂犧是饗  
是宜降福既多

莊公之子僖公也成王以周公有大功於王室  
故命魯公以夏正郊祀上帝配以后稷牲用騂  
牡

周公皇祖亦其福女秋而載嘗夏而福衡白牡駢  
剛犧尊將將毛魚載羹豆大房萬舞洋洋孝  
孫有慶俾爾熾而昌俾爾壽而臧保彼東方魯邦  
是常不虧不崩不震不騰三壽作朋如同如陵

皇祖伯禽也福衡施於牛角所以止觸也秋將  
嘗而夏福衡其牛言夙戒也白牡周公之牲也  
駢剛魯公之牲也羣公不毛犧尊尊之以牛飾  
者也毛魚豚也載切肉也羹大羹銅羹也大  
房半體之俎也慶尸嘏主人也其下皆嘏辭也  
三壽三卿也此二章言僖公致敬郊廟而神降

之福也

公車千乘朱英綠滕二矛重弓公徒三萬貝冑朱  
綬丞徒增增戎狄是膺荆舒是懲則莫我敢承俾  
爾昌而熾俾爾壽而富黃髮台背壽胥與試俾爾  
昌而大俾爾耆而艾萬有千歲眉壽無有害

大國之賦千乘兵車之制甲士三人左持弓右  
持矛中人御朱英所以飾矛綠滕所以約弓也  
周禮萬二千五百人為軍魯自襄公始作三軍  
僖公之世二軍而已二軍而曰三萬成數也司  
馬法兵車千乘為七萬五千人而曰公徒三萬

者大國之賦適滿千乘苟盡用之是舉國而行也故其用之也大國三軍次國二軍而已具胄貝飾冑也朱紱所以綴也增增衆也膺當也承禦也可以當戎狄懲荆舒而莫之禦言其強也此二章言僖公治其軍旅繕其車甲器械故其民無不欲其昌大壽考而託之以爲安也壽胥與試者願其壽而相與試其才力以爲之用也泰山巖巖魯邦所營奄有龜蒙遠荒大東至于海邦淮夷來同莫不率從魯侯之功保有鳧繹遂荒徐宅至于海邦淮夷蠻貊及彼南夷莫不率從



莫敢不諾魯侯是若天錫公純嘏眉壽保魯居常  
與許復周公之宇魯侯燕喜令妻壽母宜大夫庶  
士邦國是有既多受祉黃髮兒齒

泰山齊魯之望也詹至也龜蒙鳧繹魯之四山  
也故春秋齊人歸鄆謹龜陰之田禹貢徐州蒙  
羽其又嶧陽孤桐魯之疆則止於此四山其餘  
則其東南勢相聯屬可以服從之國也常許魯  
之故地而未復者也春秋鄭伯以璧假許田常  
或作嘗齊有孟嘗豈為齊所侵歟此三章言僖  
公懷柔遠方至於淮海蠻貊之國莫不服從而

願其壽考以復魯之侵地宜其室家臣庶以保  
有所服從之國也

徂來之松新甫之柏是斷是度是尋是尺松栢有  
鳥路寢孔碩新廟奕奕奚斯所作孔曼且碩萬民  
是若

徂來新甫皆山也八尺曰尋鳥大貌也新廟姜  
嫄廟也滌舊曰新奚斯公子子魚也曼脩廣也  
僖公上爲神之所福內爲國人之所安外爲鄰  
國之所懷於是脩舊起廢治其官室寢廟以  
順萬民之望

閔宮十三章五章章九句四章章八句  
一章十二句一章十一句二章章十句

此詩百二十句舊分八章非也當以此  
為正

那

商頌

契為舜司徒而封於商傳十四世而成湯受命  
其後既衰則三宗迭興及紂為武王所滅封其  
庶兄微子啓於宋以奉商後其地在禹貢徐州  
泗濱西及豫州孟猪之野其後政衰商之禮樂  
日以放失七世至戴公其大夫正考父得商頌

十二篇於周太師歸以祀其先王至孔子編詩而亡其七篇然春秋之際大國略皆有變風宋魯獨無風而有頌鄭氏疑而爲之說曰宋王者之後也魯聖人之後也是以天子巡守不陳其詩蓋所以禮之也子聞周之盛時千八百國雖後世陵遲力強相吞而春秋所見猶百有七十餘國變風之作先於春秋數世矣而詩之載於太師者獨十三國其不見於詩者豈復皆有說哉意者列國不皆有詩其有詩者雖檜曹之小邶鄘魏之亡而有不能已其無詩者雖燕蔡之

成國宋魯之禮樂而有不能作且非獨此也齊  
相晉文霸者之盛也而皆不得有詩相附於衛  
文附於秦皆止於一見衛莊姜齊襄公鄭昭公  
事至微矣然其詩屢作而不止蓋事有適然而  
無足疑者若夫吳楚之國雖大而用夷且僭周  
室則雖其無詩蓋亦學者之所不道也

那祀成湯也

猗與那與置我鞀鼓奏鼓簡簡衍我烈祖湯孫奏  
假綏我思成鞀鼓淵淵嘒嘒管聲既和且平依我  
磬聲於赫湯孫穆穆厥聲庸鼓有數萬舞有奕

我有嘉賓亦不夷憚自古在昔先民有作溫恭朝夕執事有恪顧子丞嘗湯孫之將

倚美也那多也置植也夏足鼓商植鼓周懸鼓鞀鼓皆所以節樂也衍樂也假至也磬玉磬也庸大鍾也客二王後也將奉也記曰商人尚聲臭味未成滌蕩其聲樂三闕然後出迎牲故其祀成湯也取其所植鞀鼓而奏之以作樂以樂其烈祖成湯樂奏而湯孫至曰以是安我所思成之人記曰齋之日思其所處思其笑語思其志意思其所樂思其所嗜齋三日乃見其所爲

齋者凡此皆非有也而生於其思故謂之思成  
於是鞀鼓管籥作於堂下其聲依堂上之玉磬  
無相奪倫者至於九獻之後鍾鼓交作萬舞陳  
於廷而祀事畢矣於時王者之後皆來助祭無  
不和悅者以爲凡此皆湯德之致也故曰自古  
在昔先民成湯造商而遺之子孫我今賴之溫  
恭朝夕執事於此而已湯其尚顧予烝嘗哉此  
湯孫之所奉者庶幾其顧之也

那一章二十二句

烈祖祀中宗也

中宗大戊也

嗟嗟烈祖有秩斯祐申錫無疆及爾斯所既載清  
酌資我思成亦有和羹既戒既平驥假無言時靡  
有爭綏我眉壽黃耆無疆約軼錯衡八鸞爲鶴以  
假以享我受命溥將自天降康豐年穰穰來假來  
饗降福無疆顧予烝嘗湯孫之將

嗟乎我烈祖成湯有秩秩無窮之福可以申錫  
於無疆以及爾中宗之所故中宗猶以其餘福  
復興我今既載清酒於尊以畀我所思成之人  
又重之以和羹於時百官總至於廟肅然無言



靡有爭者故其耆老黃耆無疆之人咸安於其位修絜其車服以來助祭既至而獻其國之所  
有凡於我受命者溥且大矣於是天降之豐歲  
以供其粢盛言人既助之天又應之然後庶幾  
祖考來格而饗其祭報之以福曰其尚顧予丞  
嘗哉此湯孫之所奉也賚我思成猶言丞畀祖  
妣古語質也醜總也

烈祖一章二十二句

玄鳥祀高宗也

祀當作禘古者君喪三年而禘明年春禘自此

之後五年而再殷祭一禘一祫祫祭之禮毀廟  
與未毀廟之主皆升合食於太祖此詩除高宗  
之喪而始祫之詩也故歷言高之先君至高宗  
而止又以大禘之詩次之而後繼以時祀高宗  
之詩高宗武丁也

天命玄鳥降而生商宅殷土芒芒古帝命武湯正  
域彼四方方命厥后奄有九有商之先后受命不  
殆在武丁孫子武丁孫子武王靡不勝龍旂十乘  
大糝是承邦畿千里維民所止肇域彼四海四海  
來假來假祁祁景負維河殷受命咸宜百祿是何

玄鳥乙也古猶言昔也糝黍稷也景大也貞均也契母簡狄有娥氏之女爲帝嚳次妃見玄鳥墮其卵而吞之因孕生契堯封之於商十四世而至於湯始受命以正域四方之諸侯四方之君罔不受命遂奄九州而有之其後世世受天命無有危殆以至武丁之子孫以武德王天下無所不勝是以諸侯建龍旂乘車奉黍稷以來助祭夫天子所居畿內千里自是以疆域四方四方諸侯賴之以安故其至者祔祔其多其大而均如衆水之赴河咸曰躬受天命天下莫不

宜之者宜其能何天祿也此助祭者所以若是其多也

玄鳥一章二十二句

長發大禘也

大禘宗廟之禘也故其詩歷言商之先君又及其鄉士伊尹伊尹蓋與祭於禘也

濬哲維商長發其祥洪水芒芒禹敷下土方外大國是疆幅隕既長有娥方將帝立子生商

濬深也哲明也京師方之內也諸夏方之外也幅廣也隕均也商之受命深遠而明其祥之見

也久矣唐虞之際禹疏積水以疆理諸夏之國  
有娥於是始大上帝則已立其女簡狄之子以  
造商室矣

玄王相撥受小國是達受大國是達率履不越遂  
視既發相土烈烈海外有截

玄王契也相武也撥治也契之爲人武而能治  
授之以國政無不能達所謂在家必達在邦必  
達者也率循也履蹈也契之所循蹈未嘗出中  
然其於事能洞視其情而遠發以應之相土契  
之孫也

帝命不違至于湯齊湯降不遲聖敬日躋昭假遲  
遲上帝是祗帝命式于九圍

商之先祖既有明德天命未嘗去之至於湯而  
王業成與天命會焉湯之所以自降下者甚敏  
而不遲故其德日以益升明假于天然而其心  
未嘗汲汲於有天下凡以敬天命而已於是天  
命之使用事於九圍九圍九州也

受小球大球爲下國綴旒何天之休不競不綈不  
剛不柔敷政優優百祿是遒

球玉也小球鎮圭長尺二寸大球琫長三尺天

子之所服也湯既受命執圭搢珽以臨朝會非以寵其身也所以挈有下國如旌旗之綴旒焉絺急也適聚也

受小共大共爲下國駿厖何天之龍敷奏其勇不震不動不難不竦百禄是總

共珙通合珙之玉也駿大也厖厚也龍寵也難竦懼也

武王載旆有虔秉鉞如火烈烈則莫我敢曷苞有三蘂莫遂莫達九有有截韋顧既伐昆吾夏桀

武王湯也曷遏通苞本也蘂餘也本則夏桀桀

則韋顧昆吾也韋豕韋彭姓也顧及昆吾己姓也湯既受命載旆秉鉞以征不義桀與三桀皆不能自達於天下故天下截然歸商於是遂伐韋顧既克之則以伐昆吾夏桀焉

昔在中葉有震且業允也天子降于卿士實維阿衡實左右商王

自契至湯其間蓋有微弱震動之憂歟信矣天子之商也降之卿士以左右商王而後商室以興阿衡伊尹也

長發七章一章八句四章章七句一章九



句一章六句

躬武祀高宗也

撻彼躬武奮伐荆楚深入其阻哀荆之旅有截其  
所湯孫之緒

撻疾意也采深也哀聚也自盤庚沒而躬道衰  
楚人叛之高宗懲然用武以伐其國入其險阻  
以致其衆戮有罪以齊一之使皆即用高宗之  
次緒易曰高宗伐鬼方三年克之蓋謂此歟

維女荆楚居國南鄉昔有成湯自彼氐羌莫敢不  
來享莫敢不來王曰商是常

既克之則告之曰爾雖遠居吾國之南耳昔成  
湯之世雖氏羗猶莫敢不來朝曰此商之常禮  
也況於汝荆楚則曷敢不至哉

天命多辟設都于禹之績歲事來辟勿子穢適穢  
穢匪解

荆楚既服天命諸夏之君凡建國于禹迹者咸  
以歲事來見於王以祈王之不譴曰子稼穡匪  
解庶可以免咎矣

天命降監下民有嚴不僭不濫不敢怠遑命于下  
國封建厥福

天監視商爲下民之所嚴而不僭不濫不敢怠  
遑故使之制命于下國封建其所當福

商邑翼翼四方之極赫赫厥聲濯濯厥靈壽考且  
寧以保我後生

諸侯歸之上帝予之故能以商邑爲四方之中  
赫赫濯濯光明也後生子孫也

陟彼景山松柏九丸是斲是遷方斲是虔松栢有  
挺旅楹有閑寢成孔安

天下旣治然後伐其松柏而新其宮室旣成而  
無所不安德之至也景山大山也九丸易直也

遷徙也度祺也挺長貌也旅楹衆楹也司馬遷  
言宋襄公脩仁行義欲爲盟主其大夫正考父  
美之故追道契湯高宗躬之所以興作商頌其  
說蓋出於韓詩近世學者因此詩有奮伐荆楚  
則以襄公伐楚之事當之遂以韓嬰之說爲信  
予考商頌五篇皆盛德之事非宋之所宜有且  
其詩有邦畿千里維民所止肇域彼四海命于  
下國封建厥福此類非復諸侯之事無可疑者  
襄公伐楚而敗於泓幾以亡國此宋之大恥既  
非其所當頌而長發之詩謂湯武王苟誠襄公

之頌周有武王豈復以命湯哉

殷武六章三章章六句二章章七句一章五句

詩集傳卷第二十

庚子淳熙七年四月十九日曾孫朝奉大夫權知筠州軍州事兼管內勸農營田事 詔重校證刊于本州公使庫